




Documentario impactante tocante 'Bullying' na Aruba den version adapta ta pasa awenochi na Telearuba

Switch Foundation a compila un investigacion completo, fuerte y real di situacionnan social na Aruba cu ta afectando

no solamente e individuo pero e economia completo di nos pais. Un di e problematica nan cu ta afectando nos hobennan directamente ta e problematica di 'Bullying'. Na nivel mundial

esaki ta hopi alarmante y sigur na nivel local e ta causando cu nos studiantenan no ta desea di bay scol pasobra nan ta wordo bati, acosa y/of yena cu insulto, entre otro.

'Switch' a transmiti e programa tocante 'Bullying na Aruba' Dialuna 15 di April na Telearuba, pero door di un demanda hopi halto di estudiante y adulto a traha un version adapta atraves di cual docentenan y instancianan lo por haci uzo di e material aki pa ilustra y splica na e hobennan y na e comunidad en general kico ta 'Bullying'.

E version adapta di e documentario aki a keda cla. E team di Switch Foundation a traha hopi duro riba dje pa asina yega na e meta di yuda conscientisa y hunto cu diferente organisacion duna ayudo/conseho na e victimanan y e agresor cu tambe tin mester di ayudo.

E documentario aki ta wordo transmiti awenochi atraves di Telearuba pa 9:10 pm y tambe por wak'e via www.switch.aw. Apoya y sigui informa di e fechanan cu e proximo programanan di 'Switch' lo air directamente via e pagina di facebook: www.facebook.com/switchfoundation. 'Switch' ta un fundacion y un proyecto dinamico cu via medionan di comunicacion ta conscientisa/educa tocante nos situacionnan social incorporando arte y cultura. Switch Foundation a habri su di 3 temporada cu hopi entusiasmo, logronan nobo y mas energia pa sigui traha pa nos hendenan di Aruba y sigui reenfora e importancia di 'samenwerking' entre instancianan cu ta traha pa cu e desaroyo di nos famia, como e unico y e arma mas poderoso pa logra un obhetivo mas lihe y efectivo. Pa loke ta 2011 y 2012, Switch Foundation a promove 46 organisacion y lo sigui haci esaki den nan futuro produccionnan como un muestra di gradicimento pa e sosten brinda. Pa haya informacion y/of guia (scolnan, companianan priva y organisacionnan) por tuma contacto atraves di switch@switchfoundation.org si ta desea di haya un copia di DVD.